



## PROPOSTA DE ACORDO ENTRE A CONSELLERÍA DE SANIDADE E AS ORGANIZACIÓNS SINDICAIS ..... SOBRE A MODIFICACIÓN DA RELACIÓN DE POSTOS DE TRABALLO E ORDENACIÓN E MELLORA DA PRESTACIÓN DE SERVIZOS FARMACÉUTICOS OFICIAIS DA CLASE DE FARMACÉUTICOS INSPECTORES DE SAÚDE PÚBLICA (FISP)

### I. PREÁMBULO

A Lei 4/1988, do 26 de maio, *da función pública de Galicia*, dispón a creación dos corpos da Administración especial, entre os que se encadran os que corresponden ao persoal sanitario.

A Lei 17/1989, do 23 de outubro, de creación das escalas de persoal sanitario ao servizo da comunidade autónoma, establece no seu art. 2 a creación da escala de saúde pública e Administración sanitaria.

O Decreto 303/1990, de desenvolvemento da citada lei, integra na da escala de saúde pública e Administración sanitaria, a clase de farmacéuticos titulares.

O Decreto 202/2005, do 7 de xullo, polo que se crea a clase de farmacéuticos inspectores de saúde pública, ten por obxecto, ademais da creación da citada clase de farmacéuticos inspectores de saúde pública, fixar as bases que rexerán o proceso de integración dos farmacéuticos titulares nesta clase. Establece así mesmo o seu ámbito de actuación, a delimitación de funcións e o réxime xurídico, retributivo e de incompatibilidades. Así mesmo, establece que os inspectores farmacéuticos de saúde pública serán como funcionarios do grupo de clasificación A1 da Lei 17 cun complemento destino nivel 20.

Pola súa banda a Lei 8/2008, do 10 de xullo, de saúde de Galicia, confire á clase de farmacéuticos inspectores de saúde pública, a condición de autoridade sanitaria, aumentado desta forma a súa responsabilidade no desempeño das súas funcións.

Na actualidade e mediante a Resolución do 16 de setembro de 2016 pola que se ordena a publicación do Acordo do Consello da Xunta de Galicia do 15 de setembro de 2016 polo que se aproba a relación de postos de traballo da Consellería de Sanidade e do Servizo Galego de Saúde, o nivel de complemento de destino é o 22, tras adecualo debido ao incremento de actividade respecto do número de establecementos que son obxecto de inspección e a dispoñibilidade, dentro da súa xornada de traballo.



## A) CARACTERÍSTICAS DOS POSTOS DE TRABALLO

O persoal farmacéutico inspector de saúde pública desenvolve actualmente actuacións en materia de control oficial que inclúen vixilancia da saúde ambiental en Galicia, sendo a súa finalidade prever a aparición de riscos relativos á saúde ambiental que podan poñer en perigo a saúde da poboación

Actualmente na Relación de Postos de Traballo da Consellería de Sanidade os 88 postos de FISP distribúense en 13 zonas de inspección tal e como se indican nesta táboa.

		RPT (prazas)
CORUÑA	NOIA	6
	FERROL	6
	SANTIAGO	7
	CORUÑA	12
LUGO	BURELA	4
	MONFORTE	3
	LUGO	9
OURENSE	OURENSE	11
	VERIN	2
	O BARCO	2
PONTEVEDRA	LALÍN	2
	VIGO-PORRIÑO	11
	PONTEVEDRA	13
<b>TOTAL</b>		<b>88</b>

O desenvolvemento destas actuacións implica a preparación e realización de inspeccións, auditorías, tomas de mostras e outros controis que se reflicten nas correspondentes actas de inspección. Correspóndelles ademais a elaboración de informes e o arquivo de toda a documentación xerada no cumprimento das súas funcións.

En consonancia coa súa condición de autoridade sanitaria, no caso de que sexa necesario, deben formular propostas de sanción, adoptar as medidas cautelares temporais necesarias e proporcionadas durante a visita de control oficial, tales como a inmovilización de produtos, a suspensión temporal de actividades ou outras, que se estimen necesarias e proporcionadas, a fin de evitar prexuízos para a



saúde en casos de urxencia inaprazable por existencia dun risco grave e inminente para a saúde.

Ao non contar cunha estrutura organizativa e/ou administrativa, os FISP desenvolven actividades administrativas de xestión e organización autónoma da zona de inspección, a planificación das actuacións ao nivel operativo, os recursos materiais, a implantación do sistema de calidade e, en algunhas ocasións, o transporte das mostras ao Laboratorio de Saúde Pública de Galicia.

As tarefas e responsabilidades descritas obrigan ao persoal farmacéutico inspector de saúde pública, a realizar desprazamentos habituais para poder recabar os datos necesarios, ter contacto con produtos biocidas e outras substancias químicas, ter risco de contacto con axentes biolóxicos como *lexionella*, inspección de instalacións de difícil acceso como son as instalacións de risco de propagación de *legionella*, recollida puntual de mostras nas praias marítimas e fluviais.

## B) FUNCIÓNS ACTUAIS DOS FARMACÉUTICOS INSPECTORES DE SAÚDE PÚBLICA

Actualmente, os FISP levan a cabo actividades de vixilancia e control oficial dos seguintes programas:

- **Programa de vixilancia sanitaria de augas de consumo humano.** Obxectivo: diminuír o risco de morbilidade asociado ao consumo de auga.
- **Programa de vixilancia sanitaria de establecementos, servizos e produtos biocidas.** Obxectivo: protexer a saúde da poboación minimizando os riscos de contraer enfermidades pola fabricación, comercialización, manipulación e/ou aplicación de biocidas na Comunidade Autónoma de Galicia.
- **Programa de vixilancia sanitaria de produtos químicos.** Obxectivo: Protexer a saúde da poboación minimizando os riscos de contraer enfermidades pola fabricación, comercialización ou manipulación dos produtos químicos na Comunidade Autónoma de Galicia
- **Programa de vixilancia sanitaria da lexionelose de Galicia.** Obxectivo: diminuír o risco de propagación da lexionelose, minimizando a probabilidade



de exposición da poboación mediante a vixilancia e o control ambiental das instalacións de risco en Galicia

- **Programa de vixilancia sanitaria das piscinas.** Obxectivo: reducir a niveis razoablemente posibles e aceptables o risco de contraer enfermidades para as persoas usuarias das piscinas.
- **Programa de vixilancia de zonas de baño de Galicia.** Obxectivo: minimizar os riscos de contraer enfermidades ao bañarse nas augas marítimas ou continentais.
- **Programa de vixilancia sanitaria de centros de bronceado de Galicia.** Obxectivo: protexer a saúde dos usuarios e minimizar os riscos de enfermidades asociadas á exposición das radiacións ultravioletas nos centros de bronceado.
- **Programa de vixilancia sanitaria dos establecementos de tatuaxe, micropigmentación e piercing de Galicia.** Obxectivo: minimizar os riscos de transmisión de enfermidades que poidan estar asociadas ás actividades que se desenvolven nos establecementos que realizan prácticas de TMP.
- **Programa de vixilancia sanitaria de sanidade mortuoria.** Obxectivo: diminuír o risco de morbilidade asociada as prácticas de sanidade mortuoria.

Ademais das actividades de vixilancia dos programas de control oficial, desenvólvense as seguintes actividades:

- Xestión do sistema de información HERME, e HERME Móbil, así como dos censos asociados a esta aplicación,
- Xestión de sistemas de información nacionais, desenvolvidos polo Ministerio de Sanidade e sustentados por aplicacións informáticas a través de Internet que precisan de administradores a nivel de zona de inspección (FISP), tales como o SINAC (Sistema Nacional de Augas de Consumo), o NAYADE (Sistema Nacional das augas de baño) ou o SILOÉ (Sistema de información das piscinas de uso público).
- Participación en proxectos europeos "REACH-EN-FORCE" para a vixilancia do cumprimento do REACH e CLP



- Participación nos proxectos Life Rural Supplies e Life Water Way.

### C) NOVAS FUNCIÓNS ASIGNADAS AOS SERVIZOS DE INSPECCIÓN FARMACÉUTICA DE SAÚDE PÚBLICA

A evolución experimentada nos últimos anos nas actuacións de vixilancia de saúde ambiental na Comunidade Autónoma de Galicia, cun incremento notable no desenvolvemento de novos plans e programas, así como a participación en proxectos europeos e a especialización tecnolóxica do persoal, fan necesario unha reestruturación da clase de farmacéuticos inspectores de saúde pública. En concreto, a partir do ano en curso (2023) levaranse a cabo, ademais das anteriores, as seguintes funcións:

**1) Actuacións dentro do novo Programa de vixilancia sanitaria de produtos cosméticos e hixiene corporal** cuxo obxectivo é o de protexer a saúde dos usuarios e minimizar os riscos de enfermidades asociadas ao uso dos produtos cosméticos e produtos de hixiene persoal na Comunidade Autónoma de Galicia.

**2) Actuacións dentro do novo Programa de vixilancia sanitaria dos espazos termais de Galicia**, cuxo obxectivo é o de protexer a saúde dos usuarios e minimizar os riscos de enfermidades asociadas ao uso dos espazos termais.

**3) Colaboración coa inspección veterinaria de saúde pública na vixilancia e control do Programa 16. Menús escolares, máquinas expendedoras e cafeterías dos centros escolares** do Plan Nacional de Control da Cadea Alimentaria dentro do obxectivo estratéxico 2.4. Promover unha alimentación saudable e sustentable, mediante o impulso da calidade nutricional e o control da mesma, nos menús escolares e nos alimentos e bebidas de máquinas expendedoras e cafeterías.

**4) Colaboración en actividades doutros departamentos da Dirección Xeral de Saúde Pública que carecen de inspectores propios como por exemplo actividades relacionadas coa vixilancia e control sanitario da normativa referente a prevención de adiccións**, así como as relacionadas coas accións a desenvolver no futuro **Plan Inspira Saúde**.

Polo tanto, todos os cambios propostos ao financiarse con aplicacións orzamentarias existentes, non supoñen incremento de gasto.



Dadas as particularidades no desempeño destes postos, o carácter de autoridade sanitaria, o aumento do ámbito competencial, a aumentada carga de traballo, o establecemento de postos de coordinación técnica e a a posibilidade de establecer quendas de tarde, así como gardas localizadas de fin de semana, xustifican a necesidade, en garantía da saúde pública, da mellora das condicións específicas de traballo (relativas as xornadas, os horarios, a mobilidade xeográfica, ao complemento de destino e ao complemento específico), da clase de farmacéuticos inspectores de saúde pública polo que se realiza o seguinte:

## II. ACORDO

### PRIMEIRO. Ámbito de aplicación

O presente acordo será de aplicación ao persoal que ocupe postos de traballo de farmacéuticos inspectores de saúde pública nos servizos periféricos ou centrais da Consellería de Sanidade reservados á escala de persoal sanitario ao servizo de Comunidade Autónoma de Galicia, clase de farmacéuticos inspectores de saúde pública.

### SEGUNDO. Revisión do complemento de destino

Actualmente os postos afectados non teñen atribuído un horario especial nin a exigencia de ter o permiso de conducir, condicións ambas que ao longo destes anos, comprobouse que son imprescindibles para un correcto desempeño. Por este motivo, para asegurar, por unha banda, que os postos son provistos por persoal que cumpre as condicións de desempeño reais, e por outro, que ese persoal ten a correspondente compensación profesional e retributiva, resulta necesario que esas peculiaridades na prestación de servizos queden recollidas na relación de postos de traballo da Consellería de Sanidade, así como o incremento de nivel correspondente. Polo tanto, as particularidades ata aquí descritas deben ser trasladadas á relación de postos de traballo, incrementando o seu nivel do actual 22 ao nivel 24, engadindo a formación específica " Permiso de conducir B (R.I.)"

A formación específica "954: Permiso de conducir B (R.I.)", só será obrigatoria para o persoal que tome posesión dos postos a partir da súa modificación, polo que as persoas que actualmente os desempeñan e que non o posúan, seguirán desenvolvendo as súas funcións como ata o de agora, sen que esa circunstancia afecte á ocupación dos mesmos."



### TERCEIRO. Horarios de traballo

3.1) A xornada de traballo do persoal no ámbito de aplicación deste acordo será a ordinaria establecida con carácter xeral para o persoal que presta servizos na Administración xeral da Comunidade Autónoma de Galicia (trinta e sete horas e trinta minutos semanais).

3.2) O persoal dos servizos farmacéuticos de inspección de saúde pública realizará un horario entre as 7:45 e as 20:45 horas, de luns a venres, mediante o establecemento de quendas obrigatorias con rotación semanal. Establécese con carácter xeral o horario seguinte:

-Quenda de mañá: de 7:45 h a 15.15 h.

-Quenda de tarde: de 13.15 h a 20:45 h.

A quenda de tarde non poderá exceder de **15 tardes ao bimestre**.

3.3) Durante os fins de semana e festivos, o horario quedará determinado pola prestación de servizos nas dúas modalidades de presenza física e/ou de presenza localizada, segundo corresponda.

A garda de presenza localizada será efectuada necesariamente desde as 7:45 h ata as 20:45 h do sábado e do domingo, e, de ser o caso, do correspondente festivo, cos medios materiais necesarios, achegados pola Consellería de Sanidade.

As gardas de presenza localizada non excederán de **10 ao ano**.

3.4) Durante os festivos coincidentes no período de luns a venres, a prestación de servizos farase segundo a modalidade de presenza localizada, en horario de 7:45 h a 20:45 h da seguinte forma:

-De coincidir un único festivo no período semanal, a prestación de servizos correrá a cargo das persoas que teñan asignadas os servizos da seguinte fin de semana.

-De coincidir máis dun festivo na mesma semana, faranse cargo dos servizos no primeiro festivo o persoal FISP que tivera asignado o servizo da fin de semana anterior e do segundo o persoal FISP que tiveran asignados os servizos da fin de semana seguinte.



3.5) No desempeño das súas funcións, cando as persoas traballadoras deban trasladarse, a efectos do cómputo de xornada terase en conta tanto o tempo efectivo de traballo na zona de destino como o tempo do desprazamento realizado (ida e retorno).

3.6) Ocasionalmente e por circunstancias excepcionais, poderán ser establecidos, pola Dirección Xeral de Saúde Pública, servizos extraordinarios, co sistema de compensación retributiva e demais condicións que se recollen no presente acordo.

3.7) Corresponderalles aos Coordinadores/as dos Programas de Saúde Ambiental da provincia a xestión e control do cumprimento dos horarios, quendas e servizos de fin de semana e festivos, sen prexuízo das atribucións xenéricas que lle corresponden aos/ás xefes/as territoriais da Consellería de Sanidade.

#### **CUARTO. Funcións durante a fin de semana ( traballos que excedan o horario ou a xornada ordinaria)**

4.1) Durante as fins de semana e festivos, o persoal obxecto do presente acordo deberá realizar as seguintes funcións dentro do seu ámbito de actuación:

4.1.1) Farmacéuticos inspectores de Saúde Pública.

Ámbito de actuación: é a zona á que estivesen adscritos os FISP. En caso necesario e debidamente xustificado podería ser o seu ámbito a provincia debido a carencia ou escaseza de efectivos e ante un risco grave e inminente.

Funcións: Vixilancia e investigación de factores de risco de orixe ambiental (alertas, abrochos/casos illados, etc) e que no necesiten presenza física.

4.1.2) Os/As Coordinadores/as de Programas de Saúde Ambiental:

Ámbito de actuación: é a provincia á que estivesen adscritos os/as coordinadores/as.

Funcións: Coordinar e apoiar aos farmacéuticos inspectores de saúde pública en caso necesario.

4.2) Cando sexa necesaria a presenza física, realizarán:

Inspección, vixilancia, toma de mostras e/ou control da calidade no ámbito da saúde ambiental. Estas función só serán necesarias naqueles casos nas





que existan actividades non programadas (alertas, denuncias, catástrofes, accidentes, etc) que requiran un especial seguimento.

Investigación, detección e control de factores de risco dos abrochos das enfermidades de orixe ambiental, tanto os que se orixinen nese período como os que se iniciasen con anterioridade e requiran continuidade

### **QUINTO. Compensacións polo réxime especial de prestación de servizos que excedan o horario ou a xornada ordinaria**

5.1) O persoal da clase de farmacéuticos inspectores de saúde pública asignados á Consellería de Sanidade, polo cumprimento da actividade antes descrita, percibirá un complemento específico especial e equivalente ao aprobado no Acordo para a ordenación e mellora da prestación de servizos veterinarios oficiais no ámbito da xunta de Galicia.

5.2) O complemento específico (CE) destes postos debe retribuír tanto as condicións específicas de traballo, como a dispoñibilidade para a realización efectiva de actuacións que excedan da xornada ordinaria e a participación en quendas de localización, polo que debe igualarse ao CE dos postos homólogos dos servizos veterinarios de inspección de saúde pública.

Farmacéutico inspector de saúde Pública: CE de 983,63 €/mes para os IVSP comarca na actualidade).

Coordinadores/as de Programas de Saúde Ambiental: O complemento específico (CE) destes postos debe ser equiparable ao co complemento específico (CE) dos servizos veterinarios de inspección de Director Técnico Sanitario de Industrias (CE de 1196,63 €/mes na actualidade).

5.3) Realización de actuacións efectivas que excedan a xornada ordinaria. Estas actuacións serán retribuídas en relación directa coas horas ou fraccións de hora efectivamente empregadas, computando como o tempo necesario por cada actuación efectiva o empregado polo/a funcionario/a tomando como punto de inicio e final da actuación a localización da zona onde estea destinado. Fíxase un valor de 22 euros hora establecendo un mínimo de 3 horas por saída en sábados, domingos e festivos, que é unha remuneración igual a recollida no Acordo para a ordenación e



mellora da prestación de servizos veterinarios oficiais no ámbito da xunta de Galicia.

A expresión "actuacións efectivas que excedan a xornada ordinaria" entenderase como traballos autorizados motivadamente e realizados mais aló do establecido con carácter xeral no punto 3.1 do presente Acordo.

### **SEXTO. Mobilidade do persoal farmacéutico inspector de saúde pública**

Co fin de acadar unha maior racionalización na distribución dos recursos de persoal asignado a cada zona farmacéutica poderase determinar a mobilidade dos farmacéuticos inspectores de Saúde Pública dentro da súa provincia nos seguintes supostos:

6.1) Necesidade de aumentar a dotación de persoal farmacéutico inspector de Saúde Pública dunha zona determinada polo incremento temporal da súa carga de traballo.

6.2) Necesidade de aumentar a dotación de persoal farmacéutico inspector de Saúde Pública nos casos de investigación e seguimento de alertas epidemiolóxicas que se produzan na zona farmacéutica.

A mobilidade dos efectivos en ningún caso será permanente e terá unha duración máxima de **35 días hábiles** ó ano, cumprido de xeito fraccionado ou continuado.

Para os efectos do cumprimento do horario, computarase como traballo efectivo a partir da saída da Base da zona á que estivera asignado o persoal (e na que se atopan os medios como o vehículo oficial). Así mesmo, para os efectos do desprazamento tomarase como punto de partida onde se atopen establecidas as zonas.

### **SÉTIMO.- Comisión de seguimento**

Créase unha comisión paritaria de seguimento do disposto neste acordo, que estará integrada por un representante de cada unha das organizacións sindicais asinantes e un igual número de representantes da Consellería de Sanidade e da Consellería de Facenda, designados polas respectivas secretarías xerais técnicas. Estará presidida pola persoa titular da dirección xeral da Función Pública ou persoa empregada pública en quen delegue.



As súas funcións son as de vixilancia, interpretación e control do contido no presente acordo.

Constituirase no prazo de tres meses da sinatura do presente acordo e reunirse de forma ordinaria unha vez cada ano natural.

### **OITAVO.- Vixencia e denuncia**

O presente acordo terá vixencia dende o momento da entrada en vigor da modificación da relación de postos de traballo na que se inclúan os postos coas características descritas no punto segundo, ata o 31 de decembro de 2025.

Non obstante este acordo continuará en vigor ata a sinatura dun novo que o substitúa ou modifique, previa comunicación da denuncia cunha antelación de dous meses a data de remate por parte dalgunha das partes.

### **DISPOSICIÓN DERROGATORIA**

Quedan sen efectos tódolos pactos ou acordos anteriores que versen sobre as mesmas materias.